

Pou
l'amour...

Dès
Bièsses

Pièce en un acte

de

Nadine Modolo

L'action.

Un jeune garçon a la même passion que son oncle, un amour démesuré pour les animaux : Serpents, scorpions, mygales et bien d'autres du même genre. Ce qui explique le célibat du tonton, habitant toujours chez ses parents, au grand désespoir de ceux-ci.

Décor.

Une porte côté cour, avant scène (véranda)

Une porte côté cour, arrière scène (cuisine)

Une porte côté jardin (salle de bain)

Une porte en fond de scène (entrée principale)

Un salon bourgeois.

Un meuble bas, un téléphone, divan, fauteuils, table.

Tout ce qui concerne la décoration a trait aux animaux.

Placer le plus grand nombre possible de: Cages, aquariums, cages d'osier....volières, veillez à simuler les contenus avec de la paille ou des branchages.

Personnages par ordre d'entrée en scène.

Kévin : Petit-fils de la maison.

Stéphanie : Fiancée de Jacques oncle de Kévin.

Jeanne : Une voisine, sans gêne à excès

Arlette : Maman de Jacques, grand-mère de Kévin.

René : Papa de Jacques, grand-père de Kévin.

Chantal : Soeur de Jacques, Maman de Kévin.

Jacques : Oncle de Kévin

Un figurant : de préférence grand et fort déguisé en gorille, une jupette est indispensable afin de faire comprendre au public qu'il s'agit d'une femelle.

Au lever du rideau, Kévin est assis, il a un petit aquarium sur les genoux, à l'aide d'une petite baguette il chipote le contenu, il paraît fasciné et attendri. On entend des bruits et cris d'animaux divers venant de la véranda, la porte étant entr'ouverte.

Scène 1 Kévin-Stephanie.

(Coup de sonnette porte d'entrée, Kévin manifeste le mécontentement d'être dérangé mais ne bronche pas, nouveau coup de sonnette, il se lève en bougonnant, dépose lentement l'aquarium envoie un baiser au contenu, referme la porte de la véranda ; fin du bruitage. Nouveau coup de sonnette.

001: Kévin: Oyi, ça va, dj' arive, on-èst jamés tranquîye li droci (Ouvre la porte, et se trouve devant une jeune fille tenant en l'air ses mains très sales) C' èst pouqwè ?

002: Stépha: Fôreut p'tête dîre bondjoû preumî (Tend la main qu'il ne prend pas) Bondjoû Kévin vo Tonton èst la ?

003: Kévin: Oyi, mins on n' pout nén l' disrindjî, il-èst fôrt ocupè (Très sec) Après tout on s'conèt ? vos vos pèrmètèz di m' lomé pa p'tit no.

004: Stépha: Bén seûr ! On m' pâle tél'mint d' vous qui dj' vos conèt pâ keûr.

005: Kévin: (Heureux d'être un centre d'intérêt) Ha! Qui ç'qui vos pâle dè mi ? Mins rintrèz dji vos-è prîye, achîdèz vous, on n' vos mindj'ra nén...Qwè qui !

006: Stépha: (Souriante) Vos daléz m' mindjî ?

007: Kévin: Mi! non i m' chène què l' tchô n' èst pus si frèche qui ça (Regard mauvais de Stéphanie) Ç'èsteut pou rîre, vos pouvèz r'satchî vos gants, i n' fèt nén frèd droci.

008: Stépha: Dji wè ç' qui c'èst, vos-inmèz Bén d'vos foute dè djins ? Vos n' wèyèz nén qui mès mwins sont rimplîyes d' crache ? Dj'é tcheû an pane an v'nant.

009: Kévin: Naturèl'mint qui dj' l' é r'mârqui, mins come dji seû bèn al' vè, dji fè chènance di rén...Vos v' lèz lès lâvér putète ?

010: Stépha: Fôt r'conèche qui ça m' freut pléji, dji n' sé ayu lès mète, èyèt d'pus c' èst scrandichant di toudis lès-awè è l' ér.

011: Kévin: Ç' èst l' vré, èt ô d'zeûs du mârtchi, si 'ne saquî rintreut, on pins'reut qu' i gn-a ène ataqe, on lîreut d' mwin dins l' gazète ;" Hier, en fin de matinée, alors que tout était calme dans le quartier, une agression sauvage a eu lieu au 117 de la rue, (Au choix) une superbe créature de rêve a subi..."

012: Stépha: (Coupe) Oh ! Merci Kevin, c' èst l'preumî còp qu'in-òssi bia djon.ne ome èm fèt in tél complimint.

013: Kévin: Ét la ! Douc'mint in m'fiye ! vos dalèz trop râde, faleut m' lèyî continûwér, èl " créatûre di rêve...C' èst mi...Mins dijèz, vos-èstèz qui ô djusse ?

014: Stépha: Oh ! c'èst l'vré dji n' m' é nèn présintè, bèn v' la, vo Tonton èyèt mi on va bèn râde yèsse èchène pou toudis...On va s'mârier.

015: Kévin : (En aparté) Co toudis yeûne.

016: Stépha: Qwè-ç-qui vos dijèz ?

017: Kévin : Mi ? rén. Anfin i fé bia pou l' sésou...Insi vos-èstèz m' futûre tatiye ?

018: Stépha: Oyi...ça vos va ?

019: Kévin : Fôt vîr (Face à elle, prend une cuillère)_Drouvèz vo bouche (Tapote sur les dents) ça pout dalèr, moustrèz m' èl plante di vos pîds (Stépha soulève le pied vers l'arrière) C' è-st-a r'fèr, fèyèz l' toûr dèl tâbe. Ok ça va, achîdèz vous.

020: Stépha: (Amusée) Vos v'lèz vîr ètou m' cârnet d' "vaccination" ?

021: Kévin : Fôt nèn rîre avè ça, tonton va sûr'mint vos l' demândér.

022: Stépha: Pont d' problème dji l' é toudis avè mi.

Scène 2. Kévin-Stéphanie-Jeanne.

023: Jeanne: (Vient de l'entrée principale) Bondjoû, (A Kévin) Is n' sont nèn co rintès ? (S'assied) La co bèn qui ç' n'èst nèn li rwè d' Prusse qu' is duv'nut r'çuvwêr, sins qwè, is dârît pou quénze djoûs. (A Stépha) Èt is sont co capâbes di roubliyî l'mitan ; L' ôte djoû is sont st-èvoyes tout l' après din.nér èyèt is-avît

roubliyi l' mindjî dés lézârdès èyèt dès rats. (Grimace de Stéphanie) anfin ! Qwè v'léz, c' è-st-insi, quand on vént ô monde bèzin on l' dimeure toudis.

Qui ç-qui vos-èstèz vous ? On n' vos-a jamés vèyu pâr ci ! (Sans laisser le temps de répondre, se lève précipitamment) Mon dieu ! m' bûre èst su l'gâz èlèctrique, èl recète dijeut " un léger roux " Tu pâles d'in roucha, (A Kévin tout en partant) Dijèz a vo Mamy qui dj' apôrt'ré lès plats qu'èle m'a d'mandè a prèsté t't-al-eûre.

024: Stépha: Qué moulin a paroles !

025: Kévin: Ça ç'èst co rén, èt on pout r' satchî lès piles, ça continûwe quand minme...On dijeut ?

026: Stépha: Qui dji voûreu bén passér al sale di bin pou r'lâvér mès mwins, insi vos n' s'rèz nén jin.nè d'vènu vos pourmwènér dins l' vilâdje avè mi.

027: Kévin: Oh vos savèz mi, a pârt lès visites ô " zoo " gn-a qu' ça qui m'intèrèsse, adon dalér avè 'ne bièsse ou bén 'ne djin, c' èst du paréye ô minme .

028: Stépha: Vos stèz in-arnaga, èt come dji wè vos-avèz l' minme passion qui vo tonton, vos wèyèz voltî lès bièsses.

029: Kévin: C'èst m'seûle passion, d'ayeûrs quand dji s' ré grand dj'âré in " zoo " pour mi tout seû...Éyèt vous, vos wèyèz vol' tî lès bièsses ?

030: Stépha: Naturèl'mint, lès tchéns, lès tchats, lès mouchons. Vos savèz qu' c' èst l' preumièrè afèrè qui vo tonton m' a d'mandè, ça dwèt yèsse impôrtant pour li ?

031: Kévin: Mon dieu Sègneûr Marîye Djosèf, si c'è-st-impôrtant.

032: Stépha: Ô d'pus dji vos choûte ô d'pus dji trouve qui vos r'chènez a vo tonton.

033: Kévin: On-arète nén d' mè l' dire.Tènèz, nén pus târd qu'ayêr ô gnût an m' foutant a l'uch, èm moman m' a dit ; Alèz-è d' meurér avè vo tonton, vos-èstèz lès deûs minmes." (Air malheureux) Oyi m'fiye, èm prope mère m'a mètu a l'uch avè m'copin (Désigne l'aquarium)

034: Stépha: Anfin ! On n'mèt nén s' n-èfant a l'uch paçqu'i r'chène a s' mononke.

035: Kévin : Dji n' vos l' fé nén dîre.

Qwè v' léz, gn-a toudis yeû dés-èfants mârtîres, vos davèz yun pa d' vant vos-îs.

036: Stépha: Vos n'èczagèrèz nén...ène toute pètte miyète ?

037: Kévin : Dijons...rén qu'ène toute pètte...Candjons d'sudjèt.

Scène 3. Kévin-Stéphanie-Jeanne.

038. Jeanne: (Entre franc battant) Kévin, dj' é roubliyî d' vos d'mandér, vo Mamy n'ôreut nén in pwin d' trop ? Dj' ôreû Bén v'lu fé dès croques pou soupér, mins dji n' é pus pont d'pwin (Kévin se dirige vers la cuisine) Téns qui vos y èstèz, rwètèz s' i gn'a nén 'ne boune live di fromâdje...(Crie vers la cuisine) Pou l'djambon ça dira, l'ôte vijène d'aveut. Mins èle n'aveut pont d' pwin.(A Stépha) T' as jamés vu, èle fèt sèscomissions casimint tous lès djoûs, èt èle n'a nén d'ja in pwin d'avance, a ç'te eûre lès djins n' sav'nut pus rinde service.(Kévin revient avec le pain et le fromage)

039: Kévin :Tènèz. Èt pou lès mindjî ça dira ? vos n'voulèz nén in rateliér ?

040: Jeanne: Ça va ça va, merci, a t't-al-eûre (Elle sort)

041: Stépha: (Etonnée) Bén ç'tèle-la...Qué culot !

042: Kévin : Ça c'est co rén .

A pârt ça, vous, vos savèz m' pètit no, èl vote c' èst sûr'mint tagada îîîîye.

Scène 4. Kévin-Stéphanie.

043: Stépha: Comint ça tagada îîîîye ? Dji m'lome Stéphanie tout simplèmint.

044: Kévin : Dji l'âreu gadji, tonton n' print qui dès coumères avè dès nos an îîîîye.

045: Stépha: Pârdon ! I d'a yeû d'z-ôtes, alèz, rèspondèz, qui ? quand ? combin ?

046: Kévin : STOP...Non mins dès côps, vos m' pèrdèz pou qui vous ? Èç qu'on d' mande a in-èfant d' fé l'mouchârd ? (Très doux) çouci dit... on pout m'ach'tér.

047: Stépha: Dj' é compris...combén ?

048: Kévin : Tout ça dépend di ç' qu'i vos v'lèz sawè, mins come vos-avèz 'ne boune tièsse èt dès bons-îs dji vos fréz in pris d'amis.

049: Stépha: Ét la copin ! Vos pârlèz d' mi come d' ène boune bièsse !

050: Kévin : Èl quèstion n' èst nèn la, vos v'lèz dès ransègn'mints oyi ou non ?

051: Stépha: (Déterminée) Oyi, bèn seûr...Vo pris ?

052: Kévin : V'la, çu qu'dji voureu, ça cousse trwès cint cénquante Euros, mins an mâtchdant gn-a moyen d' l' awè pou trwès cints.

053: Stépha: TRWES CINTS-Euros ! On pout djoûwér a cénquantes a ç'pris la, c'èst qwè pou in djeu ?

054: Kévin : C'n'èst nèn in djeu (Prend l'aquarium et le met sous le nez de Stéphanie) wètèz qu'il-èst bia, i voureut bèn awè s'pètit frère avè li...Mins, ça cousse tché.

055: Stépha: (Horriée) Mins...mins...c'è-st-in scorpion !!!

056: Kévin : Ha ça, crwèyèz m', ç' n' èst nèn in lum'çon.

057: Stépha: Jamés, jamés vos m'intindéz, dji n' s'ré complice d' in djeu parèy !

058: Kévin : (Remet l'aquarium en place) Come vos v'léz, tant pîre, ç'n'èst nèn mi qu'a dandji d'sawè.

059: Stépha: On vos léye djoûwér avè dés-afêres insi ?

060: Kévin : Oh vos savéz, l' eûre d'ôdjoûrdu, ç'n'èst nèn pus dandjeureûs qui d' bwêre ou d' mindjî.

061: Stépha: Oyi c'èst l'vré. Vos-ârez 'ne pètitte dringuéye si vos m'dijèz tout.

062: Kévin : Tout qwè ?

063: Stépha: TOUT, combén d'coumères qui vo tonton a yeû ?

064: Kévin : Va pou 'ne dringuéye, mins nèn trop p'tite ! (Hésitant au début puis accélère) Adon on dijeut...Virginîye, Julîye,

Auréliye...Nathaliye...Valériye, après gn'a co yeû...Mâriye,
Janîye,...Ratindéz...Ah ! Oyi Mélanîye...Coralîye...Australîye.

065: Stépha: (Coupe en colère) Australie c'è-st-in payis, p'tit inocint, vos dijèz n'impôrtè qwè pou satchî dès liârdès ôs djins.(Autoritaire) Èl sale di bin ?

066: Kévin: Vos t'nèz vrémint a dalér dins l'sale di bin ?

067: Stépha: Pus râde deûs côps qu'yeune, dji pinse minme qui dji va prinde ène douche pou m'rapôjî, si ça n' disrindje pèrsone....(Kévin hésite) Èt bén qwè ?

068: Kévin : Vos l'ôrez voulu...C'est pârla. Dijèz, vos stèz seûre qui l'Australie c'è-st-in payis ? (Stéphanie hausse les épaules et sort côté salle de bain) Téns ! c'èst drole, pourtant i m'chène qui dj'é intindu tonton qui d'jeut " èl cène qui m'don'ra tout l'bouneûr qui dj' mèrite, c'èst l'Australîye"...Oh après tout...Bon i s'reut tins di « décréter l'état d'urgence » paçqui dins wère di tins i va tchér' dèl tère pârla.

Scène 5. Kévin-Arlette-René

069: Kévin : (Se dirige vers la véranda, ses grands parents entrent, chargés de plusieurs sacs ainsi qu'une petite boîte en carton) Ah ! V'la lès deûs bôdèts.

070: Arlette: Bondjoû m' trésor, tout va bén ? vo moman a téléphonè ?

071: Kévin : Non, nèn co, vos n'avèz rén roubliyi ?

072: René : (Grognon) On vos l' f'ra sawè quand on vîra qui manque ène saqwè.

073: Kévin : (A Arlette) Papy èst co mô tournè ?

074: Arlette: Come chaque côp qu' i fôt fé lès grosses comissions.

075: Kévin : D'abôrd i fèt s' grosse comission tous lès djoûs.

076: Arlette: L'èst bon ch' napan, pôrtèz ça dins l'cûjène (Sacs et le petit carton)

077: René : Fôt v'nu r' qué l' rèstant d' vant di r' wétî ç'qu'i gn'a dins ceûs la.
(Kévin sort côté cuisine)

Scène 6. Arlette-René.

078: Arlette: V'la co n' boune afêre di fête.

079: René : A qui l'dijéz, (S'affale dans un fauteuil et enlève ses chaussures)
Dji n'sint pus mès pîds, mi qui n' pou sinte lès grands boutiques, minme dè
d'lon.

080: Arlette: Mi c'est tout djusse èl contrère, dji sint lès boutiques dè d'lon èyèt
vos pîds d' tout près.

081: René : On n'èst pus a l'après d'ène odeûr, avè toutes lès biesses qu'i gn'a
droci, i n'sint quand minme jamés bon.
Téns qui vos stèz stampéye donèz m in p'tit vêre pou m'èrmète.

082: Arlette: Ét co qwè ! Vos n'savèz nén vos chèrvu ? dji n'é nén l'tins, avè tout
çu qui m'dimeure a fé...èyèt fôreut nén m'prinde pou vo mèskène.
Non mins è-ç-qu'on n'dîreut nén qui vos r'vènéz du bagne ! Pou in côp an
passant qui vos fèyèz lès comissions avè mi.

083: René : Èl problème droci, c'est qu' c'est an passant èt an r'passant, èyèt
dès bârdas dji d' é pôrtè âssèz quand dj' èsteu...

084: Arlette: (Coupe) Dins lès paras, on l'sét bén vos l'avèz d'dja dit pus d'
mile côps.

085: René : È-ç-qui dji vos-é racontè l'djoû qu'i plouveut a drache èt qui...

086: Arlette: Oyi ça ètou vos l'avèz d'dja racontè. Mins pou dè r'vènu a nos
bèdots...

087: René: Ah! non si vous pléz, nén dès bèdots (Se sert une bière, et n'en
boira que la moitié)

088: Arlette: Vos-avèz réson, pou dè r'vènu ôs comissions vos savèz qui dji
m'passe bén d' vous pou lès fé, mins ôdjoûrdu come i faleut branmint dj'aveu
dandji d'vous... paçqui ôdjoûrdu c'è-st-in djoû a pârt.

089: René : Pouqwè in djoû a pârt ?

090: Arlette: Bén ç'côp ci ! Vos-avèz roubliyi qu'nos r'çuvons a soupér...No
futûre bèle fîye !

091: René : Qwè ç'qu'i gn-a avè ça, tous lès mwès on dè r'çwèt 'ne nouvèle.

092: Arlette: Oyi c'est l'vré, mins ç't-èle ci c'est l'boune d'après Jacques.

093: René : Oyi, come toutes lès-ôtes.

094: Arlette: Non non, i m'a dit qui c'esteut vrémint l'cène qu'i lyî faleut.

095: René : On vîra, mins ç' còp ci, si ç'n'est nèn l'boune, c'est mi qui s'èva.

Scène 7. Arlette-René-Kévin.

096: Arlette: Tèjèz vous vî sot. (Kévin vient prendre le reste des sacs) Dijèz m'pètit trésòr, v'léz bén cominchî a prèssér lès citrons pou l'apèritif di t't-al-eûre ? èt dins l' pètitè bwèsse an cårton c'è-st-ène surprîje pour vous.

097: Kévin : Merci mamy (S'apprête à sortir côté cuisine)

098: Arlette: D'eûchèz bén sogne savèz ! Pou in còp nos-ârons 'ne bièsse qui va no punre dès-oûs dins saquantès samwènes.

099: René : (Pensif) dji m'dimande si...

100: Arlette: (Coupe) Arètèz d'vos fè dès bîles, Jacques sèt bén çu qu' i fèt.

101: René : Vos trouvèz vous ? Djusse qu'a ç'te eûre, on n' l'ôreut nèn advinè.

102: Arlette: D'après li, èle èst djolîye, bén fète.

103: René : Oyi oyi, mins è-ç-qu' èle...

104: Arlette: (Ne l'entend pas) Bén-al'véye, douce, pòjère, pacyinte.

105: René : Tout çoula ç'n'est rén, è-ç-qu' èle...

106: Arlette: (Pensive) Djintîye, bén abiyê, prope.

107: René : Crè d'vint non ! ça n'a pont d'impòrtance ès-ç'qu'èle...

108: Arlette: Boune mènagère, èle wète a sès-afères.

109: René : Mins vos dalèz m'rèspònde a l' fin ? ès-ç'qu'èle...(Interrompu)

110: Kévin : (Entre) Mamy ! in citron ça a deûs pates ?

111: Arlette:Qwè ç-qui vos m'raboulotèz ? Mins non in citron n'a nèn deûs pates!

112: Kévin : (Pleure) D'abôrd dji vén d' prèssér in pouyon.

113: Arlette: V' la co ôte chòse téns a ç'te eûre, mi qui pinseut awè dès-oûs dins saquantès samwènes, c' èst ratè.

114: René : Si vos v'lèz, c'èst mi qui punra lès-oûs, trèze a l 'douzène, mins dji vos-è prîye rèspondèz m, è-ç-qu' èle...

115: Arlette: Wèt vol'tî lès bièsses ? Vos compèrdèz bèn qui c'èst ça qu'Jacques a d'mandè an preumî,OYI, èle wèt vol'tî lès bièsses.

116: René : (Inquiet) Toutes ?

117:Arlette: Lès tchats, lès tchéns, lès lapins, èt co BRANMINT dès-ôtes parèt-i.

118: René : On-èst scapè ! on va yèsse quite di Jacques èyèt d' toute ès' mènag'rîye. Dispèchons nous Arlette, fôt fé boune imprèssion su s'fîye la, r'mètons tout d' alure. An avant...marche (Tend son verre)Tènèz mètèz ça a l'ègout, dj' é djurè, qui si Jacques ès mârieut dji n' bwéreu pus jamés in vère di bîre.

119: Arlette: (Soulève le verre et pointe l'index sur sa tempe) Fôt yèsse in trwès quart pou lèyî in d' mi a mitan plin.

120: René : L'èst bon " Einstein " on n'a pont d'tins a piède avè vos " fractions "

Téns ça m' rapèle in copin qui r'chèneut tout a Einstein quand dj' èsteu...

121: Arlette: (Les yeux au ciel) Dins les paras.

122: René : Oyi, figurèz vous qu' i passeut s'tins a...

Scène 8. Arlette-René-Jeanne.

123: Jeanne : (Entre, sans frapper) Ah ! Tout d'minme vos stèz rintrès ? vos davèz mètu yun d'd'tins ! Dijèz Arlette, dji pou awè vo djindjole a croque mossieu a prèstér ?

124: Arlette: (Soupir, se dirige vers la cuisine.) Oyi bèn seûr.

125: Jeanne : (En direction de la cuisine) Èn roublièz nèn di donèz in côp d' lavète dèssus, svp (A René) c'èst l' vré in...come ça n' chève nèn tous lès djoûs, i dwèt awè 'ne masse di pouûssières, èyèt mi lès poussières ça m' fèt stièrni.

126: Arlette : (Revient et donne l'appareil à Jeanne.) Tènèz Jeanne, (Ironique) vos n'avèz nèn dandji d' djambon télcôp ?

127: Jeanne : Non non merci.

T't al-eûre, dji vénrè vos-apôrtér mès plats...Dji vos d'mand' ré seûl'mint di fé fôrt atinciyon, paçqui c'è-st-in souv'nir di famîye...Fôt nèn crwére...mins si vos d'viz lès louwér ça vos cous'treut saquants-Euro, tandis qu'mi dji vos lès prèste bèn djintimint...Èt POU RÉN (Sort)

128: Arlette: Qwè-ç-qu'èle sèt m'èscrypér l' chignon ç'tèl-Ia, i lyî manque toudis l' centime pou fé l'Euro.

129: René : Co eûreûs qu'èle n'a nèn d'mandè du fromâdje èyèt du pwin. Qwè ç'qu'on dijeut...Ah ! Oyi dji vos raconteu, qu'èl copin qui r'chèneut tout à " Einstein "passeut s'tins a....

130: Arlette: (Lasse) Contér lès p'tits pwès qu'i gn-aveut dins l'ratatoûye.

131: René : Pour mi dji vos l'é d'dja raconté, ça n'fé rén vos l'intindrèz co t't-al eûre, c'èst tél'mint comique qu'on l' racont' ra a no futûr béle fiye pou l' fé rîre. (Très soucieux tout-à-coup) Èt si ça n'pèrdeut nèn !

132: Arlette: Dji n'vou nèn î sondjî, ça s'reut tèrîbe pou no Jacques.

133: René : Èyèt pou nous-ôtes adon ?

134: Arlette: I s'reut bèn-oblidji d'prinde l'ôte.

135: René : Qué l'ôte ?

136: Arlette: I d'a ène ôte an résèrve qu' i m'a dit.

137: René : Pourvu qui ça n' fuche nén in vî rossignol.

138: Arlette: Avè sès-idéyes, si d'veut chwèsi intrè in vî rossignol èyèt 'ne coumére, vos compèrdèz ôjîl' mint qu'i pèdreut l' vî mouchon.

139: René : Dijèz, vos-avèz fé dès-études pou yèsse si bièsse ? ou ça vos vént naturèl' mint...Vî rossignol ça vout dîre fond d' boutique.

140: Kévin : (Entre, en s'essuyant les yeux) Mamy, vos-avèz roubliyi lès nwès d' coco pou lès sindjes.

141: René : Pus dandji d' nwès d'coco, ô diâle lès nwès d'coco, lès grènes, èl fourâdje èt tout l'rèstant.

142: Arlette: Èn beûlèz nén insi su ç'n-èfant la ! Vos n'wèyèz nén qu'il-a dèl pwène d'awè prèssè s'pouyon ?

143: René : I n'aveut nén dandji di r'chèner a in citron, c'est bén fèt pour li.

144: Arlette: Èn brèyèz pus, v'nèz fé 'ne pètte gâtéye a mamy, m' pètit pouyon.

145: Kévin : (Pleure de plus belle) Èm pètit pouyon, èm pètit pouyon...

146: René : Ç'est malén in ça ! vos n'plîz nén trouver ôte chôse qu'èm pètit pouyon ?

147: Arlette: Pârdon m'pètit canârd...a l'orange, stièrdèz vos-îs, fôt yèsse bia pou quand vo futûre tatîye ariv'ra.

148: Kévin : Èle èst la.

149: René : Comint avèz dit ?

150: Kévin : Dj'é dit...èle èst la.

151: Arlette: Non non, èle n'ariv'ra qu'a sèt-eûres eûreûs'mint d'ayeûr, paçqui nos
d' vons muchî dès p'titès-afères qui pourît lyî displère. Vos savèz bén n'do ?

152: Kévin : Pou l'dérin còp, dji vos dit...ÈLE ÈST LA.

153: René : (Angoissé) Ayu la ?

154: Kévin : Dins l'sale di bin.

155: Arlette: Dins l'sale di bin!!! Mins èle va vîr l'ôte, èt tonton Jacques ayu èst-i?

156: Kévin : Dins l' vèranda i sogne lès viêrs di tère, èt lès soris.

157: Arlette: Pouqwè l'avéz lèyi dalér dins l'sale di bin ?

158: Kévin : Béh ! Pou r'lâvér sès mwins èt putète minme prinde ène douche qu'èle a dit, paçqu'èle a tcheû an pane an v'nant ça fêt qui...(Se pince le nez)

159: Arlette: Faleut l'èvoyî dins l'cujène a l'éviér !

160: Kévin : Prinde ène douche pad'zous l'robinèt azârd !

161: René : Dji n'sé nén mi...Mins nén dins l'sale di bin inocint,INOCINT.

162: Kévin : (Sort porte principale) Maman maman, Papy m'a dit inocint.

Scène 9. Arlette-René-Chantal.

163: René : Courèz rad'mint après ou Bén i va dîre a Chantal qu'on-a flayî d'ssus.

164: Arlette: L'èst bon insi, dj'é dès-ôtes trècas pou l'momint, di toute façon èt i n'va qui trwès môjos pus lon.

165: René : Non quate.

166: Arlette: Qwè quate ?

167: René : Oyi quate...ène môjo djum'léye ça fêt deûs èyèt deûs ça fêt quate.

168: Arlette: On-èst dins l'pètrin djusse qu'ô cô, èyèt Mossieu done dès l'çons d' mathématique.

169: René : Qui ç'qui vos dit qu'on-èst dins l'pètrin ? ça n'vos chène nén drole qu'on n'a co rén intindu dispûs qu'on-èst rintrè ? mi dji vos dit qu'èle print ça du bon costè...

170: Arlette: Dijèz, vos-avéz chûvu lès minmes coûrs què mi, dins l'minme èscole pou yèsse si bièsse ? Dji dit qu'èle n'a co rén vèyu v'la tout.

171: René : Èt comint n'ôreut-èle co rén vèyu ?

172: Arlette: Si èle print 'ne douche, èle n'a pont d'rèson di rwétî padrî l' ridô d'èl bingnwêre, ça no done co 'ne pètte chance, mins i fôt prév'nu Jacques.

173: Chantal: (Entre souriante) Bondjoû lès-ancètres, èt adon on maltréte èm gamin ?

174: Arlette: (L'embrasse) Bondjoû m'fîye, qué nouvèle ?

175: René : Bondjoû m'pètte pouyète.

176: Arlette: Christian ça va ?

177: Chantal: I stièrni come d'abutude.

178: Arlette: Vos-avèz r'satchi tout ç'qui l'fé stièrni ?

179: Chantal: A m'idéye oyi, mins i prétint qu'i gn-a co 'ne saqwè dins l'ér qui lyî fét du tôrt, ça dwèt yèsse in rèstant dè ç'ti-la, (Désigne l'aquarium) ou Bén adon il-è-st-alèrgique a Kévin.

180: Arlette: Tout doûs avè m'pètit m'gamin ! On-è pout rén si vos-avèz mârîe in-ome qui n'a pont d' santè, faleut prinde vo tins èt rèflèchi.

181: Chantal: Dj'inme ostant d' meurér avè in-ome qui stièrni, pus råde qui dins-ène mènag'rîye come droci.

182: René : Mon dieu ! Come dji vos comprend, qu'èl bon dieu féye qu'i s'mârîye in còp pou toute èt qu'i nos disbarasse di tout s'tchinisse.

183: Chantal: Maleureûs'mint " la relève est assurée " come on dit, vos r'cominchèz lès minmès bièstrîyes avè Kévin.

184: Arlette: Vos-î aléz fôrt ! On-n'pouvent quand-minme nèn l'lèyî a l'uch avè s'copin, come i dit (L'aquarium)

185: Chantal: I n'èst nèn quèstion d'ça, mins i s'reut tins d'lyî fé comprinde qui d'djouwér avè dèscorpions, dèssèrpans, dèsaragnes ça n'èst nèn normâl.

Anfin

ç' n'èst nèn pou ça qui dj'seû v'nûwe, i m'a racontè dèsafères qui dji n'é nèn compris, i m'a dit qui tagada îîîye aveut tcheû d'ssus l'pane, qu'èle aveut dèsc

gants nwérs pou prèssér l'pouyon paçquè l' citron èsteut dins l'bwèsse an cârton, qui papy lyî aveut dit inocint, vos wèyèz ça qué coum'lâdje !

186: Arlette: Bén v'la, figurèz vous qu'vo frère (Cri strident de la salle de bain)

187: René :Trop târd, èle-l' a vu !

188: Chantal: Qui, a vèyu qwè ?

Scène 10.Les mêmes plus Stéphanie et Jacques

189: Jacques: (Entre côté véranda) C'èst l'vwès da Stéphanie...N' m'dijèz nèn qu'èle èst dins l'sale di bin !(Affolé) Stéphanie...Stéphanie (Sort salle de bain)

190: Chantal: Mins anfin qwè ç-qui s'passe on droci ?

191: Arlette: Tèjèz vous, choûtons

192: Stépha : (Voix off) Lèyèz m' passér.

193: Jacques: Vos n'dalèz nèn vûdî avè ça su vo tièsse ?

194: Stépha : Lèyèz m' passér, qui dj'vos dit.

195: Jacques: R'mètèz ô mwins vos solérs !

196: Stépha : Dji n'dimeur'ré nèn 'ne sègonde di pus avè léy.

(Ils entrent tous les deux, Stéphanie en sortie de bain,un essuie autour de la tête, pieds nus, ses vêtements sur les bras, elle les tiendra jusque sa sortie.Jacques tout penaud la suit, avec les chaussures qu'il tiendra tout le temps entre l'index et le majeur.

197: Jacques: Stépha ratindèz, n'pârtèz nèn insi, i gn-a putète moyén d' s'arindjî.

198: Stépha : Non non èt non !

199: Jacques: A l'amiâbe, sins cris, pôjêr'mint !

200: Stépha: Ç'èst fini, vos n'mè r'vîrèz jamés pus.

201: Jacques: Ç'n'èst nèn ç'qui vos pinsèz savèz !

202: Stépha : Non !!! Dijèz tout-tchôte qui dj' é yeû l'bèrlûwe.

203: Jacques: Dji n' é nén dit ça ! Mins...

204: Stépha : Comint avéz pu m'fé ça ? C'est disgoustant !

(Pendant le dialogue de Stéphanie et Jacques, les trois autres personnages se sont fait petits, Chantal ne comprend rien à ce qui ce passe.

205: René : (Timidement) Bon...bon...bondjoû mam'zèle.

206: Stépha : (Sèchement) Bondjoû...Ou pus râde non...Arvwêr.

207: Arlette: (Mielleuse) Bondjoû mam'zèle, télcôps lès-îs n'dij'nut nén l'vèritè çu ç'qu'is wèy'nut savèz.(Pose la main sur l'épaule de Stéphanie pour la faire asseoir) in Jacques...

208: Jacques: Oyi Bén seûr, on va vos spliquê...In papa ? (Stéphanie s'est levée)

209: René : (La rassied fermement en souriant) Naturèl'mint nos s'tons la pou ça, Arlette va vos racontér tout dispûs l 'dèbut...In Arlette ?

210: Arlette: Bén v'la, tout a cominchî...Mins Chantal trouv'ra lès mots qui...qui...Lès bons mots qwè ! èle a branmint pus d'instruction qu' mi wèyéz...In Chantal ? (Stépha se lève)

211: Chantal: (La rassied) Dji n'sé nén di qwè ç'qu'i r'toûne mins on pout asprouvér.

212: Stépha : (Se lève) Fôt nén vos scrandi, dji m'é brouyi, v'la tout.

213: René : (La rassied) Oyi, vos vos-avèz brouyi, èt après, on s'trompe Bén sins bwére, d'acôrd, vos stèz v'nûwe a midi al place di sèt-eûre mins gn'a rén avè ça...In Arlette ?(Stéphanie fait mine de se lever, mais René la maintient fermement assise)

214: Arlette: Bén seûr qu'i gn'a rén avè ça, on mindj'ra 'ne târtine avè du boudin , èt ô niût nos f' rons l' soupér toutes lès deûs èchène.

215: Stépha : (Se dégage et se lève) I n'sagit nén d'boudin ni d'soupér, On wèt Bén qui vos n'avèz jamés stî dins 'ne situwâçion paréye.

216: René : Mon dieu m'fiye ! c'est la qu'vos vos brouyèz, (Il la rassied) Insi, pa in bia djoû d'èsté, adon qui dj'èsteu...

217: Arlette Chantal Jacques : Dins lès paras.

218: René : (Fier de lui) Non, ô Kénia, la, dj'vos-é bén yeû.

219: Stépha : (Se lève, va vers Jacques qui s'est assis l'air abattu) A r'vwêr Jacques fuchèz eûreûs avè lèy (Se dirige vers la porte d'entrée, hésite, regarde autour d'elle)

Scène 11. Lès mêmes plus Jeanne.

220: Jeanne : (Derrière la porte d'entrée) Arlette, drouvèz l'uch, dji vos-apôte ène dîjène di plats.(Stépha sort précipitamment... fracas de vaisselle) dji vous dîre, sèt plats.

221: René : (Court après Stéphanie) Mam'zèle, èn pârtèz nèn insi, ça va s'arindjî. (Sort, nouveau fracas de vaisselle.)

222: Jeanne : (Toujours dans les coulisses) Arlette avè cénq ça dira ?

223: Arlette: (Après René) René René n'vos mèlèz nèn d'ça.(Sort, nouveau fracas)

Scène 12. Jeanne-Chantal-Jacques.

224: Jeanne: (Apparaît un seul plat dans les mains, le regarde tristement) Il-a vrémint l'ér bièsse insi tout seû (Le jette par terre, prend les chaussures des mains de Jacques, et les jette dans les coulisses, revient vers Jacques.)
Cendrillon è-st-èvoye èm gârcon, èle-a lèyî in magasin ètire di pantoufes di vére a l'intréye.

225: Chantal: (A Jeanne) On pout dîre qui vo n-intréye èst fracassante.

226: Jeanne : Dji vos fréz r' mârquî qu'c'est n'èst nèn dè m'fôte, c'est lès-ouragans qui m'ont bousculè pou ratrapér" Cendrillon"
A propôs, vos djoûwéz dins qué dèssin animè ?

227: Chantal: Si vos pouvîz mè l'dîre, ça m'arindj'reu, tout çu qui dj'é advinè c'est qui gn-a in-ocupant ou OCCUPANTE dins l'sale di bin.

228: Jacques: (Distrait) Oyi c'est ça "occupante"

229: Jeanne: (Embarassée) Ah oyi ! ...Èt l'gamin...ça va ?

230: Chantal: Toudis lès minmes problèmes, l'èscole zéro, pont d'copin, i n's'intèrèsse a rén d'ôte qu'a sès sales bièsses, èt tout ça a còse dè li (Montre Jacques)

231: Jacques: Mè v'la co rèsponsâbe di tous vos maleûrs.

232: Chantal: Bén seûr qui c'est d'vo fôte.

233: Jeanne : Vos n'dalèz nèn vos-angueûlér pad'avant vo vijène tout d'minme ? Vos savèz bén qui ça èst malôjîle pour mi, di n' nèn l' racontér a tout l'vilâdje.

234: Chantal: Vos n'ârez qu'a dire qui vos-avèz assistè a 'ne dispute intrè deûs mamifères. Tout l'monde sét bén qui c'è-st-ène môjo " d'accueil pour animaux en détresse "

235: Jeanne : Vos n'dalèz nèn d'in voulwêre a vo frère paçqui vo gamin inme mieus lès bièsses qui lès djins ?

236: Chantal: I gn-a bièsses èyèt bièsses, vos savèz çu qu'il-a ofru a Kévin pou s'preumî anivèrsère ?

237: Jeanne : Dji n'sé nèn mi...In nounours an p'luche ?

238: Chantal: Vos l'pinsèz ! Ça âreut stî trop bia...In jon.ne di vipère avè in ruban rôse a s'cô.

239: Jacques: Oyi, èt après, c'èsteut 'ne réson pou qu' vo Christian stran.ne èl pôve pètte bièsse avè l'ruban ? Dispûs l'gamin dwèt tout muchî droci.

240: Chantal: On lyî a donè l'ôtorisâcion d'awè in-aquariom dins l'abri ô fond du djârdin, tout a bén stî djusse qu'i gn-a deûs djoûs, a ç'te eûre Christian r'cominche a stièrni, a s'dimandér çu qu'i s'passe la d'dins. On-a nèn l'drwèt di rintrér,on l'a prom'tu.

241: Jeanne : Adon, fôt rèspectér vo parole.

242: Chantal: (A Jacques) Bon, vos dalèz m'dîre qui ç'qu'èst dins l'sale di bin, èt qui n'vout nèn vûdi, èle-èst si moche qui ça ?

243: Jacques: Ô contrère, èle-èst djolîye, Bén fète seûl'mint èle pèse trante cénq kulos.

244: Chantal: Trente cénq kulos ! Èt vos trouvèz qu'èle èst Bén fète !!! èle è-st-anorècsique ?

245: Jacques: Nèn du tout èle-èst boulimique, crwèyèz-m, èle d'in f' reut blèfèr pus d'yun, (Pâmé) èle vos-a dès cwisses...Dès cwisses...hum !

246: Jeanne : (Faussement honteuse) Jacques...Anfin !

247: Chantal: Jacques ène mîyète dè t'nûwe svp, alèz l'quér èt dijèz lyî d's'abîyî, mi, sès cwisses, ça n'm'intèrèsse nèn, çu qui conte c'èst çu qu'èle-a dins l' tièsse. Èt d'abôrd d'èyu vént-èle ?

248: Jacques: D'in cente di r'chèrche d'ormones.

249: Chantal: Ah ! ç'è-st-ène chèrcheûse !!!

250: Jacques: Non, lèy èle-a trouvè...Li ètou d'ayeûrs.

251: Chantal: Ah ! paçqui c'è-st-ène feume mâriyée ?

252: Jacques: Ç'n'èst nèn 'ne feume, c'è-st-ène guèrnouye.

253: Chantal: Qwè !!! ène guè...ène guèrnouye di trante cénq kulos ?

254: Jacques: Dji vos dit qu'èle vént d'in cente di r'chèrche d'ormones, on daleut lès tûwér, tous lès deûs, adon dji lès-é r'pris.

255: Chantal: Èle si lome eûforîye azârd ?

256: Jacques: Non, Juliète.

257: Chantal: Juliète...Mins adon Roméo....

258: Jacques: Èst dins vo n-abri d'djârdin, Jeanne a donè s'vîye bingnwêre pou l'mèt didins.

259: Jeanne : Fôt nén m'dè voulwêr Chantal, c'èst vo moman qui m' la d'mandè, on n'saveut nén lès mète tous lès deûs droci.

260: Chantal: Insi vos s'tèz tèrtous complices ? Dès sots...Dès sots, Christian èyèt mi nos vikons ô mitan d' sots. (A Jacques) Vos n' trouv' rèz jamés a vos mârier...Jamés vos m'ètindèz ?

261: Jeanne : Dji m'èva savèz, surtout n'vos batèz nén ça n'chève à rén.(Elle sort)

Scène 13. Chantal-Jacques-Kévin.

(Kévin entre, porte principale, il a une petite boîte qu'il tient précieusement, il sort vers la véranda, Chantal tout à sa conversation ne l' a pas vu.)

262: Chantal: Èrpèrdons nos-èsprits, choutèz p'tit frère dji vos wè voltî, mins lèyèz m' vos dire qui vos-èstèz su n'mwêche voye si vos v'lèz vo mârier. Gn' a pont d' fiye qui voûreut vikî ô mitan d' bièsses di toutes lès sôtes. Combin d'coumères avéz d'dja yeû ?

263: Jacques: Dj' é arètè d' contér a vint-chîj.

264: Kévin : (Revient sans sa boîte) Tonton ça va mô.

265: Chantal: Kévin lèyèz nous tranquîye, dj'é a pârlér a vo tonton

266: Kévin : (Se tortille) Tonton, dji vos di, ÇA VA MÔ, dji lès-a..mygales.

267: Jacques: Vos-avéz lès-amygdales ? Fôt nén vos mète dins-in état parèy pou ça m' gamin, in djoû d'opitâl èt on n' dè pâle pus.

268: Chantal: V'la co du nouvia, tout pou n' nén dalér a scole. Jacques dji vos dijeu...

269: Kévin : (Très inquiet) Tonton si vos pléz dispétchèz vous ! ça va stoufi.

270: Jacques: Adon fôt s'dispétchi, dji vos mwin.ne a l'opitâl, mins rapôjèz vous, fôt d'dja dès fameûses amygdales pou stoufi.

271: Chantal: (Se prête à ce qui lui semble être un jeu) Pôve petit trésôr ! I va passér su l' biyârd, dji n'vou nén vîr ça.

272: Kévin : Alèz tonton, dispétchèz vous !

273: Jacques: Qwè dè pinséz Chantal ? ça n'vos disrindje nén si c'est mi qui l'mwin.ne pou l'fé opèrer ?

274: Chantal: (Théâtrale) Alèz-è Jacques, il-è-st-impossibe pour mi di mwin.nér
m' prope èfant a l'abatwêr.

275: Jacques: Allons-y, courageuse victime de la science !

276: Kévin : (Au public) Èyèt dîre qui ça fèt pârtiye dè m' famîye...Qwè v'léz on chwési sès-amis, mins nén s'famîye.

Scène 14. René-Arlette-Chantal-Kévin-Jacques.

277: René : (Suivi d'Arlette) Bén, gn'aveut lontins qui dji n'aveu pus couru après 'ne djon.ne fîye.

278: Arlette: Èl principâl c'est d'l'awè ratrapè, (A Jacques qui s'apprêtait à sortir avec Kévin) Vos sôrtèz vous deûs ?

279: Jacques: Oyi, dji va fé opèrer l'gamin, il-a lès amygdales (Clin d'oeil)...Èt Adon Stéphanie ?

280: Arlette: Oh ! m'pôve trêsoûr, comint avéz atrapè ça ?

281: Kévin : Ç'èst l' facteûr qui lès-a apôrtè.

282: Arlette: Èl facteûr !!!

283: René : Mins anfin Arlette, qwè d'pus normâl qui d'èvoyî dès-amygdales pa coli postâl ? Gn' a rén d'drole a ça.

284: Arlette: Oyi ç'èst l'vré, dins no famîye ! gn' a jamés rén d'drole.

285: Jacques: (Impatient) Èt adon...Stéphanie ?

286: Arlette: Èle è-st-a costè, d'lé Jeanne, èle èst disbôtchîye l'pôve èfant, èle nos-a dit qu'èle pouveut tout supôrtér, come bièsses, sèrpants, lézârd, surtout dès sindjes... Mins nén 'ne guèrnouye di trante cénq kulos.

287: Kévin : (Tire la manche de Jacques) Tonton si vous pléz, èles sont la !

287: Jacques: (Sans s'occuper de Kévin) MINME DES SINDJES! Merci sègneûr, rén n'est pièrdu.

288: Chantal: Siya Jacques, come tèrtoutes èle f' ra pârtîye di vo tablô d'chasse.

289: Jacques: Ç' n'est nén co seûr, (A Kévin) Gamin vos-amygdales ça s'ra pou in-ôte còp. (Sort précipitamment)

290: René : Qwè ç'qu'i lyî print ?

291: Kévin : Qui ça èst compliqué lès grands ! Dji va wétî d'sognî mès mi... Mès-amygdales mi-minme (Sort côté véranda)

292: Chantal: Kévin, alèz c'est fini on n' djoûwe pus, fôt rintrér, dj'é co 'ne masse di mouchwès a r'poli pou vo pére...Ç'èst l' minme qui si dji pârléu ô mur.

293: René : On dit toudis qui tout fini pa s'arindjî, dji m'dèmante bèn ayu ?

294: Arlette: Ç'èst l'moral qui fôt, récapitulons, Jacques èst co toudis tout seû, èm' soupér n'est nén co cominchi, lès plats sont st'an mile boukèts, Kévin a lès-amygdales Christian stièrni. A pârt ça toutes nos bièsses sont st-an boune santè.

295: René : A pârt mi.

296: Arlette: Qwè ç'qui vos-avèz co vous ?

297: René : Dj'é mô mès rins a tout skètér, ça dwèt yèsse in rèstant d'èl croque qui dj'é yeû quand dj'èsteu...

298: Arlette: DINS LES PARAS...Vos vos l'vèz tous lès djoûs avè 'ne saqwè d'nouvîa èt vos n'èstèz prope avè rén, non, mi dji dit qui ça n'va nén si mô qu'ça.

299: René : Puçqui vos l'dijèz !

Scène 15. Tous.

300: Jeanne : (Entre en éternuant, elle a des plats très poussiéreux) Dj'é lèyi lès-amoureux bèrdèlér a leû n-ôge, èyèt su ç'tins la dj'é stî cachî après mès vîs plats ô guèèèr (Eternue) nî...tènèz Ar...lette, (Eternue)

301: Arlette: (Prend les plats et éternue aussi) merci, Jeanne c'est djinti mins... (Eternue) Ç'n'est nén co seûr qu'on va fé a soupér, vos pl'èz Bén ralér avè,(Rend les plats) paçqui lès pou...(Eternue) ssières ça m'fèt stièrni.

302: Chantal: Mon dieu Moman vos n'dalèz nén vos-î mète ètou !

303: René : Vos pl'èz Bén pârlér vous ! Vos roublîyèz çu qui vos fèt stièrni vous?

304: Kévin : (Entre en tenant sa mygale par une patte aussitôt,Chantal éternue) R'wètèz tèrtous dji l'lé scapè, èm'pètit Tassin, i r'vént a li.

305: Chantal:Tassin ? Tassin ? (Eternue) nè m'dijèz nén qui vos-avèz ètou Pitivier.

306: René : (Riant aux éclats) Qué concèrt mèz-amis ! gn-a qu' mi qui tén l'côp. Fôt dire qui m'faut d'dja branmint pou m'fé stièrni.

307: Jacques: (Entre joyeux) Tout è-st-arindji, Kévin dji vos fé cadô di Roméo èt Juliète, Stéphanie ni lès vout nén. Si èle èst v'nûwe pus timpe c'èsteut pou m'dîre qui sès parints nos donît leû môjo dès-Ardenne, seûl'mint nos d' vous fé saquants travôs, ça fèt qui, si ça n'vos disrindje nén nos d' meurons ci deûs trwès ans.

308: René : Pont d'problème èm gârçon, trwès-ans ça èst co râde passè, alèz l'quér pou qu'èle vène assistér ô concèrt " ârtroque" (Chantal, Jeanne, Arlette ne cessent d'éternuer)

309: Jacques: (Mal à l'aise) Ç'èst qui...Léy ètou, a 'ne pètte bièsse di compagnîye.

310: René : A l'après d'ça ! Trwès-ans c'èst râde passè. Jacques, fait signe à Stéphanie de venir, elle apparaît accompagnée d'un gorille en jupette avec un gros noeud sur la tête, il minaude et se trémousse en regardant René. Celui-ci est bouche bée, les autres n'en reviennent pas, seul Kévin est ravi.

311: Arlette: Gamin dj'é l'idéye qui c'èst léy vo futûr mamy.

312: René : Ô la la dji n'seû nén a m'n'ôge.

313: Stépha: N'enchèz nén peû, vos lyî avè tapè dins l'î._

Tout à coup le gorille saute dans les bras de René l'embrasse...s'écarte brusquement et se met à éternuer de même que René, Kévin se précipite sur une boîte de mouchoirs en distribue à tout le monde pendant que tombe le rideau,

314. Kévin : Qwè ç-qu'on n' freût nén pou l'amour...dès bièsses...

Nadine Modolo.
5, Rue Gillemont
6120, Ham-sur-Heure.
Tél : 071.21.69.51.
GSM : 0476.94.16.58.

Répertoire Sabam.